

JPA taja pelajar bidang kritikal di luar negara

Oleh Kadir Dikoh

BH, 10 Jun 2004, M5 2 (TPA)

KUALA LUMPUR: Jabatan Perkhidmatan Awam (JPA) memberi keutamaan dalam bidang kritikal seperti perubatan untuk penajaan mengikuti program ijazah luar negara 2004 bagi lepasan Sijil Pelajaran Malaysia (SPM).

Bidang lain ialah pergigian, farmasi, kejuruteraan, bioteknologi, sains dan teknologi, sains aktuari serta perakaunan.

JPA dalam pekeliling terbarunya menyatakan, sebanyak 13,340 permohonan diterima tahun ini, 90 peratus melebihi sasaran iaitu peruntukan untuk kira-kira 1,300 pelajar.

"Dengan jumlah tawaran terhadap, ramai pelajar yang memo-

hon tidak akan mendapat peluang untuk mendapat tajaan JPA. Disebabkan bilangan permohonan yang berkualiti begitu tinggi, temu duga diadakan pada 15 hingga 17 April dan 18 Mei lalu.

"Seramai 3,896 orang dipanggil temu duga. Setiap empat orang pelajar yang dipanggil temu duga, hanya satu yang akan ditawarkan. Ini juga bererti bagi setiap 10 pelajar yang memohon, hanya seorang dipilih untuk mendapat tajaan JPA," katanya.

Selain pencapaian akademik berdasarkan kursus yang dipilih sebagai kriteria utama, syarat lain ialah pembabitan dalam kegiatan ko-kurikulum, kesesuaian kombinasi subjek dengan pilihan kursus, bilangan tempat yang ditawarkan bagi sesuatu program/kursus, bi-

dang diperlukan negara dan latar belakang keluarga.

Pekeliling itu berkata, JPA juga perlu mengambil kira aspek kekosongan tempat pengajian di negara destinasi seperti United Kingdom, Amerika, Australia, Perancis, Jerman dan New Zealand yang hanya menerima bilangan pelajar terhad dalam setahun.

Untuk itu, JPA juga sudah berusaha mencari alternatif lain dengan menghantar pelajar dalam bidang tertentu ke negara seperti India, Indonesia, Russia dan Asia Barat.

Bagaimanapun katanya, selaras hasrat kerajaan menjadikan Malaysia sebagai pusat kecemerlangan pendidikan, bilangan ditawarkan oleh JPA turut mengambil kira peruntukan yang ada, di sam-

ping keberkesanan kos dalam menentukan agihan pelajar mengikut negara.

JPA juga memaklumkan, keputusan untuk penajaan Program Ijazah Luar Negara di kalangan lepasan SPM boleh dibuat semakan mulai 3 Jun lalu.

Sehubungan itu, calon yang sudah menghadiri temu duga boleh menyemak sama ada berjaya atau tidak mendapat tajaan untuk Program Ijazah Luar Negara JPA melalui laman interaktif JPA iaitu www.interactive.jpa.gov.my atau www.interactive2.jpa.gov.my.

Surat rasmi tawaran tajaan JPA bersama butiran dari segi bidang kursus, negara destinasi dan kolej persediaan yang perlu dihadiri akan dikeluarkan kepada calon yang berjaya dalam sedikit masa lagi.